

Regional News Unit AIR Aizawl
Tuesday, July 16, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Cheng vaibelchhe 150 vel car loan lem hmanga, Mahindra & Mahindra Financial Services Ltd. in a tihchingpennaah, Mizorama car dealer 4 te an inhnamnawih ngei ni a hriat a ni .
- Printing & Stationery Minister Pu F. Rodinglian zirlaite harsatna hrethiam in zirlaibu chhut a nih nghal theih nan ama Department sum hmanga chhut nghal vat a ni ang a ti.
- Palestine raltlante tanpuina turin sawrkar laipui chuan a thawhkhat nan dollar maktaudai 2.5 United Nations Relief and Works Agency, UNRWA ah kum 2024-25 atan a chhunglut.
- US President Joe Biden-a chuan President hlui Donald Trump-a thah tum anih chungchangah Pennsylvania rally-a venhimna kalpui dan a chhui tir dawn.

<><><>

MIZORAM POLICE PR

Cheng vaibelchhe 150 vel car loan lem hmanga, Mahindra & Mahindra Financial Services Ltd. (MMFSL) in a tihchingpennaah, Mizorama car dealer 4 te an inhnamnawih ngei ni a hriat a ni a, Mizoram Police chuan a bultumtu Jakir Habibur Hussain leh a thurualpui mi 19 lakah Chargesheet pahnih a thehlut.

He inbumna thilah hian CK Hyundai Cars, NBE TATA, Rafael Nissan leh AIDU Motors Renault te nen MMFSL te hi tanghovin hmarchhak bial pum tuamtu sum tih chingpenna lian ber pawikhawihna hi a thleng a ni.

Mizoram Police thuchhuah tarlan danin, he case chhui zuinaah hian Bank account 177, a belkhawma cheng vaibelchhe 5 awmna hren niin, car model hrang hrang 15 man a ni bawk. Heng car hlutna hi vaibelchhe 10.5 vel nia chhut a ni. Heng bakah hian customer lem loan lakna - 2035, seal leh stamp lem - 25, laptop – 3, mobile phone – 10, SIM Card – 35, mimal I.D engemaw zat leh pawikhawih nana hman ni ngeia hriat hmanrua eng engemaw man a ni bawk.

Hemi kaihnawih ni ngeia lang thubuui dang ziah luh belh a ni a, Dr Lalnienga, Dy. Chief Medical Officer, Aizawl West District chuan tunhnai khan SBI Dawrpui Branch-a a CIBIL Score a check naah Mahindra & Mahindra Financial Services Ltd. (MMFSL) hnuaiah a hriat lohvin Vehicle loan la anga process a nih thu a hriat chhuah avangin complaint a thehlut a, hetiang complaint hi mimal, an hriatpui lohva loanlem siamna atana an document an hmansakte hnen atangin a la luh belh zel turah Mizoram Police chuan a ngai a ni, an ti a, Hnuchhui hi la chhunzawm zel a ni a, midang inhnamnawih te pawh an la awm nia hriat a ni a, mihring leh bungrua man belh a awm a nih chuan chargesheet pawh a tul anga siambelh a ni ang, an ti.

Hetihlai hian, Mizoram Chamber of Commerce & Industries chuan vawiin khan thuthar thehdarhtute kawmin car dealer te thlavang hi an hauh a, Mahindra & Mahindra Financial Services LTD (Mahindra Finance), Aizawl Branch sum buai leh document lem tam tak siama Vehicle Loan lem an pek chungchanga Mizorama car zuartute hmer tel an ni chu a diklo a ni an ti a, hemi chungchangah hian Mizoram Motor zuartute an inhnawmhawih velo a, Dik takin loan-in motor an pekchhuah thin thu leh GST pawh rinawm takin Mizoram Sawkarah an lo chhunglut thin a ti bawk.

<><><>

HEALTH CARE

Mizoram sorkarin health care scheme a duan thar - Universal Health Care Scheme (UHCS) chu thla thar August-ah tlangzarh hman beisei a ni a; UHCS-ah hian sorkar hnathawkte leh pension tawhte telh tum a ni.

Health minister Pi Lalrinpuii chuan, health care scheme tha tak nei turin theihtawp an chhuah tih sawiin Universal Health Care Scheme a nih ang ngeiin Mizoram mipui zawng zawng huamtir an tum a ti a. Health care tha thei ang ber neih an duh a, theihtawp chhuahin meeting pawh tum eng emaw zat an nei tawh a, tun hma lama harsatna awm ang kha a awm loh nen an bei niin a sawi bawk.

Pi Lalrinpuii chuan, pensioner-te leh sorkar hnathawkte thun vek tum a ni tih sawiin, Health care-ah hmun hnih atanga hamthatna dawn a rem loh avangin uluk taka ngaihtuahna sen a ngai a ti a. Pensioner-te phei chu an health care neihah sum an dawng tam thei si lo a, health care tharah hian tel ve ngei se an duhsak niin a sawi. UHCS-ah chuan cheng nuaih 5 thleng pawisa pek nghal ngai loin damdawi inah inenkawl theih a ni dawn tih a sawi.

Sorkar hnathawk leh pensioner-te nen inbiakna a kal mek tih sawiin Minister chuan, Sorkar hnathawkte nen hi chuan an inbe fel thawkhat tawh a, an monthly contribution turah tlemin an la indawr deuh nia sawiin. Pensioner-teah chuan contribution turah harsatna an la nei. Pensioner-te health care thara an tel hi an tana tha tur a nih avangin an tel ngei an duhsak a ni," a ti.

<><><>

MCC PRESS CONF

Mizoram Chamber of Commerce & Industries zirchianna a a landanin Aizawla thlai thar man to chhan chu a phurhna man to vang a ni.

MCCI President Pu K Lalhmingthanga chuan nimin khan Aizawl Press Club-ah chanchinbu mite kawmin, he thu hi a sawi a, tunhmaa thlai thar bus a phurh thin chu traffic tawt lutuk avangin maxi cab ah phurh a ni taa, a phurh man hi a into hleih viau avangin thlai man pawh a to phah ta a ni a ti.

Pu K Lalhmingthanga chuan kum 5 kalta atanga an zirchianna ah hmarchapui leh bawkbawn eikhawp Mizoramin a thar chhuak pha lo a ti a, heng thlai pahnihte hi phai lam atanga lakluh anih avangin a man pawh a to hle a, hei vang hian a thar hunloh lai pawha thar thei tur a hma lak theih an rin thu sawiin, Horticulture emaw Agriculture Department te hian research nei thei se an duh thu a sawi.

Sorkar chuan thil man to tur venna hmanrua ah Co-operative movement hmang se an duh tih a sawi baw a, Mizofed chu Consumer Co-operative Federation an nih angin tuialhthei leh eirawngbawlna Gas bakah nitin mamawh chi hrang hrang zawrhchhuah kawngah hma la tel se, an hnathawh chu mipuiin an chhawr nasat leh zual an beisei tih a sawi.

<><><>

SCHOOL TEXT BOOKS

Mizoramah zirlaite'n Samagra Shiksha hnuai zirlaibu an la dawn kim loh chungchangah Mizo Zirlai Pawl MZP hruaituten Printing & Stationery Minister Pu F. Rodingliana an hmu a,

Pu F. Rodingliana chuan zirlaite harsatna hrethiam in zirlaibu chhut a nih nghal theih nan ama Department sum atanga zirlaibu chhut nghal vat a nih tur thu MZP hruaitute a hrilh tih MZP thuchhuah chuan a tarlang a.

MZP chuan, hemi chungchangah vek hian School Education Department changtu Minister chu hmuh an tum a, amaherawhchu an hmu theilo a, zirlaite harsatna tawh sukiang tura engtik lai pawh a awm tura ngaih an hmu thei lo chu an ngaithiamlo hle tih an sawi a ni.

Mizoram chungah Samagra Shiksha hnuai zirlaibu a thlawn a sem la dawngkimlo school 1270 an la awm tih RTI act hmanga zawhna chhanna ah tarlan a ni a, Lekhabu la dawng kimlo te hi Primary school 581, Upper primary school/ Middle school 689 te an ni. Aizawl district ah Primary School 173 leh Middle School school 136 ten Lekhabu hi an la dawng kimlo a ni.

Mamit district ah school 236, Lawngtlai district ah school 206, Lunglei district ah school 164, Kolasib district ah school 88, Hnahthial district ah school 86, Champhai district ah school 62, Saitual district ah school 37, Khawzawl district ah school 36, Serchhip ah school 33 leh Siaha district ah school 13 ten lekhabu a thlawna sem tur hi anla dawng kimlo a ni.

Congress Thalai pawhin thuchhuah siamin, Mizorama school hrang hrang ten term Exam hmasa ber an Exam tan tawh laia, Mizoram chungah zirlaibu la dawng kim lo school 1200 chuang an la awm chu pawl an tih thu an sawi a. Mizoram zirna sawpchhiatna nasa tak a thlengah an ngai tih an sawi a ni.

<><><>

DISASTER TRAINING

Disaster Management and Rehabilitation Department leh 1st Bn Mizoram Armed Police tang kawp ten kar thum chung awh, chhiatrupna a lo thlen thulh a chhanchhuahna hna thawh dan tur zirna hun State Disaster Response Force te tan 1st Bn Mizoram Armed Police Headquarters, Aizawl Armed Veng ah training an buatsaih a.

He hun hi Joint Director (Operation), DM&R Pu PC Lalchungluran a kaihuai a, Disaster Management and Rehabilitation Department Secretary Pi K Lalrinzuali chuan Training-a tel te chu chhiatrupna a lo thlen thulh ah an thiamna te hmang tangkai a, tanpui ngai te tanpuitu ni thei turin theihtawp chhuah a training a tel turin a chah a ni.

State Disaster Response Force training ah hian 1st Bn MAP atangin mi 33 training turin an tel a. Disaster Management & Rehabilitation Department, Aizawl District Quick Response Team leh National Disaster Response Force lam a mithiam ten chhiatrupna a thlen thulh a hliam tuar chhanchhuah dan leh bawih sawm dan te, tuitla an awm a chhanchhuah dan te an zirtir a ni.



PALESTINIAN AID

Palestine raltlante tanpuina turin sawrkar laipui chuan a thawhkhat nan dollar maktaudai 2.5 United Nations Relief and Works Agency, UNRWA ah kum 2024-25 atan a chhunglut.

UN-a India palai sawidanin UN agency ah hian dollar matkaduai 5 chhunglut turin India chu a intiam a. Heng sumte hi Palestinian raltlante tan healthcare, zirna, chhawmdawlina leh mipui nitin mamawh phuhrukna tura tih a ni.

UN agency ah hian kum 2023-24 thleng khan tanpuina sum hi dollar tluklehdingawn 35 Palestinian raltlante tan hian India chuan a pe tawh a ni.



PRESIDENT BIDEN

US President Joe Biden-a chuan President hlui Donald Trump-a thah tum anih chungchangah Pennsylvania rally-a venhimna kalpui dan a chhui tir dawn. President Biden-a chuan he thu hi White House ah sawiin kha programme-a venhimna ruahman dan chhui turte hi zalenna zau tak pek an ni a ti a. An thil chhuichhuah hi langtlang takin America mipuite hmaah puanzar a ni ang a ti.

President Biden-a chuan Donald Trump-a thah tum anih chungchangah US mipuite inlungruah taka awm tura chahin an ramin tharum thawhna a duh lo tih a sawi a. He paiwkhawihna chhuitu Federal Bureau of Investigation (FBI) ten engmah tibuitu awmloa an chhui a duh thu a sawi bawk a ni.

